

Xujun xi ma joho xi kits'ínkjihí nda postru Pablo xuta ninku Tesalonika

B'i ts'ín kikjaniñaha Pablo xuta ninku xi tjin nanki Tesalonika

1 An Pablo, Silbano ko Timoteo tísuniñaihi, jun xuta ninku xi tintsuboo nanki Tesalonika, xi kikj'áts'enuu Ntia Na'miná ko Nda Ntiana Jesucristo.

²Kas'enuu kjuanda ko kjuajyu xi tsjáná Ntia Na'miná ko Nda Ntiana Jesucristo.

B'i ts'ín kitsúya Pablo ni xi kamat'ain xuta nk'ie nga kj'uaí ngaha Jesucristo

³Jun já nts'e, jin tjihin nga tehente k'uaíhi máb'achjíhi Ntiana nga ja kichjubó éhen. Kixi tjihin nga b'a n'ei, at'aha 'yún tís'ejin sanuu éhen Ntiana ko at'aha b'i ngján 'yún t'n'etj' so xinkiu. ⁴Kui nga tsjo mahani jun ajihi xuta ninku xingisoo xi Ntiana ta ts'e. Tíbxínyai xi nkú ts'ín t'n'e chúkjuo ni xi t'imat'on ko xi nkú ts'ín t'n'e s'ejun Ntiana, ndaha tsa t'n'e unchanuu ko nkjin t'ikj'á kjuanima tísakúnuu. ⁵Kui ni xu'bi xi bakúchji nga kixi basehe Ntiana mí nihi xi nda ko tsa xi najmi nda tít'sín xuta. Tíb'axkinuu nga jun xi tsuhunu má batéxuma. Kui kjuaha nga un t'ibehenuu.

⁶Kixi ts'ín Ntiana nga tsjáha kju'un xuta xi tít'sínkj'ajinnuu kju'un ⁷ko nga tsjánuu jun xi t'n'ekj'ajinnuu kju'un nga n'ekj'áiyakoni. B'a kama nistjin nga kj'uaí kúchji yjoho Nda Ntiana Jesu, nk'ie nga nibajenko nk'a ján ntítsjehe xi tjihi nga'yún nga tjenjin ts'ihin nd'í. ⁸Kj'uaí ts'ínk'íéchj'í xi najmi be Ntiana ko xi najmi kint'é'éhen én nda tsuhu Nda Ntiana Jesu.

⁹Kui xutaha xi ts'ínkj'áhihi kjuanima nga ndyja sín. N'ekj'í t'axín nginkun Nda Ntiana. Najmi skué kjuachánkaha ko nga'yúhun. ¹⁰B'a kama kui nistjiun nk'ie nga ja kj'uaí ts'ínkj'áhihi Nda Ntiana kjuachánkaha ajihi xuta xi ts'e, ko ngayjee xuta xi kis'ejihin tsjo kamaha nga skué. Ta choo at'aha kin'e s'ejun éhen Ntiana xi tsíxínyai ajinnuu.

¹¹Kui kjuaha, nk'ie nga chubakohoni Ntiana tehente chubantj'áhi ri, tu xi k'uaíkinuu Ntiana nga jun xi tsuhunu nga kamankukoo

xuta xi j'ájin. Binchihi Ntíaná nga kats'íntjusunko nga'yúhun ngayje tíkjá ni xi nda mjenuu nga n'oo ko ngayjee xá xi t̄ín'o tu ngat'aha nga s'ejinnuu. ¹²Nk'ie nga b'a kama, sakúhu kjuachánka Nda Ntíaná Jesu ajinnuu ko jun ta sakúnuu kjuachánka ngat'aha Nda Ntíaná, xi nkú ts'ín t̄jehen ra kjuandaha Ntíaná ko kjuandaha Nda Ntíaná Jesucristo.

B'ì ts'ín tsakúya Pablo ni ch'onk'un xi kama kintehe ni nga kj'uaí kúchji yjoho Jesucristo

2 Jun já nts'e, ngat'a ts'e nga kj'uaí ngáha Nda Ntíaná Jesucristo ko nga kama n̄jakúkaá, jin t̄íbinchihi ²nga najmi tu kitsa n'ek'óntjaiyo xi nkú ts'ín n'enkjíntak'un. Najmi tu fantaha ruu yjonuu tsa kuinú'yó éh̄n nga ja kuichu n̄istjin nga kj'uaí ngáha Nda Ntíaná, ndaha tsa t̄jín xi b'a kuitsu nga Espirituhu Ntíaná títs'ínkinchjaha ko tsa b'a kuitsu nga éhen Ntíaná t̄íb'énjímí, ko ndaha tsa n'ek'jóhooon nku xujun xi nkúhu tsa jin kin'e nibái.

³Ndahachí najmi tu 'bainto tsa t̄jín xi k'uanachanuu. At'aha kintehe ni nga kuichú kui n̄istjiun, t̄jun incha ts'ín t'axín xuta Ntíaná ko kuakúchji yjoho nda xi ngatitsuun ts'ehe, xi ngak'ien t̄jehen ra.

⁴Kui xi ts'ín chánka yjoho ko ngjuai kontraha ngayjee ni xi tsu xuta nga Ntia ko ngayjee ni xi benkjún xuta. Santaha ante nkjúhun n̄inkuhu Ntíaná k'úéjña nga ntia ts'ín ma suba yjoho.

⁵¿A najmi ta f'áítsjehénnuu, nk'ie nga tsáteñajinnuu kixinyanuu ni xu'bi? ⁶Ko ja yo nd'ai mí nihi xi t̄íb'échjaha nda xi ngatitsuun ts'ehe, tu xi kuakúchjihi yjoho nga kuichú n̄istjih̄in. ⁷At'aha ja títs'ínxá nd'ai nga'yúhun ngatitsun xi t̄jña'moo. Tu ni xi ndyjahá sa, ndyja nga chjúxin xi t̄íb'échjaha nd'ai. ⁸Nk'iehé kuakúchji yjoho nda ch'onk'uun. Tungga ntjo ts'ahá Nda Ntíaná Jesu ts'ín nganakoho ra ko nd'íhi sénnistjih̄in ts'ínkjekoo nk'ie nga kj'uaí.

⁹Ndanindoo ts'ínxájih̄in nda ch'onk'uun nk'ie nga kj'uaí. Chánka nga'yún xi kj'uaíko. Ts'ín ni xi kuakúchji nga'yúhun ko kjuankjún tsank'á ts'ín. ¹⁰Ts'ínchjén ngayje tíkjá ni xi najmi nda nga k'uanachaha xuta xi t̄jihin nga ndyja. Kui xutaha xi kits'ín t'axín éh̄n xi naxu, éh̄n xi kama ts'ínk'ankih̄i kai. ¹¹Kui kjuaha nga Ntíaná ts'ín nibáha ra xuta xu'bo nku nga'yún xi k'uanachaha nga s'ejihin éh̄n tsank'óo. ¹²B'a ts'ín n'enijéhe ra ngatentee xi najmi kis'ejihin éh̄n xi naxu, xi tu sahá kama tsjoho ni xi najmi naxu nginkun Ntíaná.

B'ì ts'ín kinchja Pablo nga ndjá kuinchajin xuta Tesalonika ni xi ts'e Ntíaná

¹³Tungga máha jin, tehente t̄jihin nga k'uaíhi máb'achj̄ihi Ntíaná at'aha kichjubó éhen. 'Yún tjoho Nda Ntíaná jun, já nts'eé. At'aha santaha nkúhu nga tuts'ihin ni j'ájinuu Ntíaná tu xi n'ek'ankih̄inuu ngat'aha Espirituhu Ntíaná xi títs'ín jenuu nginkun ko ngat'aha

én naxu xi kis'ejinuu. ¹⁴Kui kjuaha kinchahanuu Ntíaná nga kits'ínkint'énuu én nda tsu xi y'enijmíi ajinnuu, tu xi b'a ts'ín sakúhunu kjuachánkahá Nda Ntíaná Jesucristo.

¹⁵Kui b'a maha, já nts'e, ndjá tinchahanu ko n'etjusun ni xi tsinchiyó nga kin'ekjas'eihín, ni xi tsixínyaihi ko xi y'ét'a xujuihín. ¹⁶Tjoho ñá Ntia Na'miná ko tsjá nga'yúnná ko tsjáná nga chúyahá ni xi nda, at'ahá chánka kjuandaha. Nda Ntíaná Jesucristo ko Ntia Na'miná ¹⁷katsjá nga'yúhun animanuu ko kats'ín nga ni xi nda n'oo ko chubo.

B'i ts'ín tsanki Pablo nga chubako Ntíaná

3 Ni xi xín yanuu, já nts'e, chubantjáiini nk'ie nga chubakoo Ntíaná. Tinchúhuu nga kitsá katjitse ko nda ts'ín kan'ekjáhín éhen Nda Ntíaná tu má xi tjuhén ni. B'a katuma xi nkú nga kama ajinnuu. ²Ko tinchíntjaini tu xi Ntíaná kjéxihinni ajihín já xi kits'ínkatsún kjuankjintak'uhun ko ch'onk'un xi tjín. At'ahá najmi ngayjee xuta s'ejihín Ntíaná.

³Tunga ts'íntjusuhún Nda Ntíaná ni xi nchja. Kui xi ndjá ts'ínkinchánuu ko kúnnuu ajihín ni ch'onk'un xi tjín. ⁴Xihí nkuhú Nda Ntíaná s'ejinná behe tak'uín nga t'n'etjusun ko nga tu nku n'etjusunnú kjuatéxuma xi kin'ekjas'eihín. ⁵Nda Ntíaná katsjániyáha animanuu nga n'e mjo xi nkú ts'ín mjehe ñá Ntíaná ko nga n'e chúkjuo ni xi tíbitjáiún xi nkú ts'ín kits'ín chúkjuo Cristo.

B'i ts'ín tsakúya Pablo nk'ie nga ts'íinxá xuta ninku Tesalonika

⁶Jun já nts'e, ngajoho Nda Ntíaná Jesucristo b'a tí'miíhi nga n'e t'axíhuun yjonuu ngatentee já nts'eé xi tjíntu ts'e, xi najmi tíincha ts'ín xi nkú ts'ín tjíña én xi tsakuyáihí ko kin'ekjóhoon. ⁷At'ahá jun ja yo xi nkú ts'ín tjíhin nga kuíntsuboo nga chase chubayani. Najmi tintsuba ts'eí ajinnuu.

⁸Ndaha nku najmi chuba kichinei nichinehe tsa najmi y'echjiihi. Nístjin nístjen ní kin'exáí ko kiyai kjuanimá tu xi ndaha nku xi tjín ajinnuu najmi jin y'enéhe ri yjoni. ⁹Kjuaxi nga kama tsinchiíhi ni xi kamachjénni kai, at'ahá tjínni kixi nga b'a n'eí. Tunga tu sa ní kin'exáí nga y'ejña chubayaihi xuta, tu xi b'a tá n'e'henu xi nkú nga kin'eí. ¹⁰At'ahá nk'ie nga tintsubaí ajinnuu, kik'aihi kjuatéxuma xu'bi: “Tsa tjín xi najmi mjehe ts'íinxá, tá najmi kakjine ma.”

¹¹At'ahá tínu'yái én nga tjín ajinnuu xi tjíma ts'e, xi najmi chumi nihi xi tíincha ts'ín, nga tu sahá chuba tíincha tsungijihín yjoho má najmi kui tjuhén ra. ¹²Ngajoho Nda Ntíaná Jesucristo b'a tí'miíhi ko t'binchiíhi xuta xu'bo nga tu sahá jyukj'i kats'íinxá. B'a ts'ín sakúhu ra ni xi machjéhen.

¹³Ko jun já nts'e, najmi tu n'ekjentohoo yjonuu nga n'oo ni xi nda.
¹⁴Tsa t̄jín xi najmi ts'ínsih̄in én xi t̄ib'et'ai xujuin, chase sisiun yá xi b'a ts'ín̄ ko najmi ta makohonu, tu xi katuma subaha ra. ¹⁵Tunga najmi tu chasehé ruu xi nkúhu tsa kui xi xuta kontrānuu. Tjenniyá níhuu at'aha nda nts'o maha.

B'i ts'ín kits'ínkje Pablo xujuin

¹⁶Nda Nt̄ianá xi tsjánā kjuajyu, kui xi katsjá tehentenuu kjuajyu ajihīn ni xi kuitj̄aiun. Nda Nt̄ianá kat'ejñajinnuu ngatentoo.

¹⁷An Pablo ntunā t̄ib'et'áhanuu kjuasuniñanā. Kui xi bakúchji ngayjee xujun xi ts'ínk̄jih̄i xuta. B'a ts'ín̄ b'et'á.

¹⁸Ngatentoo kas'enuu kjuandahā Nda Nt̄ianá Jesucristo.